

憨山大師法彙初集

(第十冊)

憨山大師自傳·緒言【中英文】  
憨山大師法像及墨寶

憨山大師法彙初集

憨山大師法彙初集

憨山大師緒言 中英合刊

香港佛經流通處印行



# 憨山大師緒言

## 憨山緒言

有物者。不可以語道。夫萬物紛紜。非有也。有之者。人也。人不有。則萬物何有。凡有物者。必殉物。殉物者。幾

亡人。人亡矣。孰與道哉。物與人也。甚矣夫。

忘物者。不足以致道。夫不有物者。達物虛。物虛則不假忘而忘矣。而云我忘物已。我忘物已。有所可忘。非眞忘。故云。不足以致道。

淪虛者。未足以盡道。夫心不虛者。因物有。物虛而心自虛矣。心虛物虛。則心無而有。物虛心虛。則物有而無。如斯則又何滯哉。而必以虛爲虛。取虛爲極。是淪虛也。何盡道。

忘與不忘俱忘。忘忘矣。而必拘俱。忘忘矣。而不拘俱。難噫。至矣哉。安得無忘。而無不忘。無俱而無不俱者。

而與之言忘俱耶。

今夫致道者在塵必曰動易體。出塵必曰靜易造。以動易者如寶石火。以靜易者如可急流。石火似有急流似停。易此者是不達動靜之原。生滅之本也。

被物動者。我之招也。不有我孰能動哉。觀夫長風鼓於天地。木折而竅號於太虛。何有焉。故至人無我。虛之至也。以其虛故不動。

心體原真。習染成妄。故造道之要。但治習。治習之要。純以智。嘗試觀夫融冰者焉。火勝則冰易消。智深則習易盡。

我信人不信。非人不信。信不及也。人信我不信。非我不信。不足信也。故我信信心。人信信言。言果會心。則無不信矣。

銖兩移千鈞之至重。一私奪本有之大公私也者。圓明之晝。生死之帶也。是以得不在小。失不在大。聖人戒慎恐懼。不睹不聞之地。

勞於利。勞於名。勞於功。勞於道。其勞雖同。所以勞則異也。是以有利不有名。有名不有功。有功不有道。有道者。道成無不備。

陸魚不忘濡沫。籠鳥不忘理翰。以其失常思返也。人

而失常。不思返。是不如魚鳥也。悲夫。

趣利者急。趣道者緩。利有情。道無味。味無味者。緩斯急也。無味。人孰味之。味之者。謂之真人。

心本澄淵。由吸前境。渾濁其性。起諸昏擾。悶亂生惱。推原其根。其過在著。

一瞥在眼。空華亂起。纖塵著體。雜念紛飛。了瞥無華。銷塵絕念。

至細者大。至微者著。細易輕。微易忽。衆人不識。聖人兢兢。由乎兢兢。故道大功著。萬世無過。

物無可欲。人欲之。故可欲。欲生於愛。愛必取。取必入。



入則沒沒則已小而物大。生輕而物重。人亡而物存。古之善生者。不事物。故無欲。雖萬狀陳前。猶西子售色於麋鹿也。

吾觀夫狎虎狼者。雖狎而常畏。恐其食已也。故常畏色。欲之於人。何啻虎狼哉。人狎而且玩。食盡而心甘。恬不知畏。過矣乎。虎狼食身。色欲食性。

色欲之於人。無敵也。故曰賴有一矣。若使二同。普天之人。無能爲道者。吾意善敵欲者。最以智。助智以厭。厭則懼。懼則遠遠。則淡。淡則忘。忘之者。望形若偶人。視味如嚼蠟。何欲哉。

難而易。易而難。衆人畏難而忽易。聖人畏易而敬難。是以道無不大。德無不弘。功無不成。名無不立。

世之皆以功名爲不朽。謂可以心致。故勞心。謂可以形致。故勞形。且夫盡勞而未必樹。樹而未必固。無去聖人孰能固哉。不固則朽。何固哉。吾謂不朽者。異夫是。知吾之不朽不朽矣。

榮名者。跂名。榮位者。跂位。旣跂矣。辱何加焉。故曰。跂者不立。不立者無本。無本而名位之。兢兢乎得失也。何榮哉。

富不大。以其蓄有蓄則有亡。故不大。貴不至。以其高。

有高則有下。故不至。是知達人無蓄。故富莫大焉。無高。故貴莫至焉。

藏迹者非隱。迹隱而心未必忘。馮名者非顯。名顯而道未必著。故隱非正。顯非大。吾所謂隱顯者。異乎是。吾所謂隱顯者。隱於體而顯於用也。體隱則廓爾太清。萬境斯寂。用顯則森然頓現。一道齊觀。如斯則逆順隨宜。窮通一致矣。噫。處此者。博大真人哉。

君父之命不可逃。況大命乎。嘗試觀夫負小技。而不達大命者。居常爲失意。當分爲棄時。故蹕蹠之心。憤激託言。而要乎世。噫。過矣。夫達人觀之。猶人酣酒夜

行而射。顙於柱。抱布鼓而號。救於天也。雖然。布鼓存焉。知命者不取。

以機爲密。非密矣。以道爲密。密也。夫吾嘗觀夫弄弩者。岌岌然百發而數獲。此善者也。而況不善者乎。善爲道者。能宥物。不發而物無所逃。故密莫大焉。勁莫至焉。

天地循環。千變萬化。死生有常。人莫之測。不測其常。徇物而忘。聖人返物。故乃昌。

人棄我取。故人之所有。我不有。我之所有。人不有。人非不有。以其不知有。故不有。設知有。我何異哉。

塵垢汚指必濯而後快。貪嗔害德而不知祛。是視德不若一指也。指污有生德害失性。

負重者累多。知者勞累久則形傷。勞極則心竭。殆已所以殆者。事外也。是以重生者。事內不事外。循己不循人。志存不志亡。

變通難言也。人莫不以趨利避害爲然。而吾實不然。亦有夫利害置前而不可却者。變也。何通耶。衆人隨之。君子審之。聖人適之。適之則不有。以其不自有。故不有。

人謂之盜物者爲盜。非盜也。吾謂之盜心者爲盜。確

已夫。夫盜盜物未必盡。有禦必不入。設入必獲。獲則死無容。既死矣。奚盜哉。夫盜盜心必盡。失禦急而愈入。設獲且生。而多又縱之。尤有誨之者。慎之哉。

道盛柔德盛謙。物盛折。是以柔愈強。謙愈光。折愈亡。古之不事物者。故乃長。

密於事者心疏。密於心者事達。故事愈密。心愈疏。心愈密。事愈達。心不洗者。無由密。是以聖人貴洗心。退藏於密。

一刺在膚。側掉而不安。衆刺在心。何可安耶。刺膚膚潰。刺心心亡。

大威可畏。觀夫天地肅殺者。大威也。萬物雖衆。靡靡然孰能當之。故夫人有威者。承天也。天威至。公人威効。公天威愛物。人威主生。

化人無功。化己有功。己果化。而人不化。自化矣。徵夫觀德人之容。使人之意也。消信夫。

治逆易。治順難。逆有對。順無知。故有知者。遇逆如甘露。畏順如鳩毒。慎之至也。以其慎。故守不失。慎也者。成德之人歟。

心體本明。情塵日厚。塵厚而心日昏矣。是以聖人用智不用情。故致道者。以智去情。情忘則智泯矣。忘情

者。近道哉。

智鉅事微。善達事者。莫若智。故智之器。挫銳解紛。無不利。嘗試觀夫片雪點紅爐。清霜消烈日。以其勝之也。故自勝者。孰能禦之。

人以大巧。我用至拙。人巧以失。我拙以得。故善事道者。乘巧取拙。無不獲。

順我者喜。逆我者怒。喜怒迭遷。好惡競作。日益其過。推原其由。本乎不覺。不覺。卽忘返也。

恣口體。極耳目。與物鏤鑠。人謂之樂。何樂哉。苦莫大焉。隳形骸。泯心智。不與物伍。人謂之苦。何苦哉。樂莫



至焉。是以樂苦者苦日深。苦樂者樂日化。故効道之人。去彼取此。

天地不勞而成化。聖人以勞而成功。衆人因勞而遂事。事遂者逸。功成者退。故曰。功成事遂身退。天之道。多財者驕。高位者慢。多功者伐。大志者狂。勝才者傲。厚德者下。實道者隨。

不了假緣。橫生取捨。識風鼓扇。浩蕩不停。如海波澄。因風起浪。風若不起。波浪何生。識若不生。萬緣何有。故致道者。不了卽生。了卽無生也。善哉。

源不遠。流不長。道不大。功不固。是以聖人德被羣生。